

CBETA電子佛典集成

CBETA Chinese Electronic Tripitaka Collection
ebook

X70n1378

無明慧性禪師語錄

(侍者)妙儼·圓澄·妙全·
道隆·圓照·法洪·唯道 編

目次

- [編輯說明](#)
- [章節目次](#)
 - [目錄](#)
 - [No. 1378-A 無明性和尚語錄序](#)
 - [蘄州資福禪寺語錄](#)
 - [蘄州北山智度禪寺語錄](#)
 - [南康軍廬山歸宗能仁禪寺語錄](#)
 - [南康軍廬山開先華藏禪寺語錄](#)
 - [南康軍廬山棲賢寶覺禪寺語錄](#)
 - [平江府陽山尊相禪寺語錄](#)
 - [平江府雙塔壽寧萬歲禪寺語錄](#)
 - [頌古](#)
 - [趙州見二菴主](#)
 - [外道問佛](#)
 - [開口不在舌頭上](#)
 - [大力量人擡脚不起](#)
 - [大力量人脚下紅線不斷](#)
 - [瀋山晏暉推移](#)
 - [南泉斬猫兒](#)
 - [法語](#)
 - [寄顏一齋居士](#)
 - [寄顏一齋閣內寂室方氏](#)
 - [付淨徹首座竹篋](#)
 - [沈安齋草菴號常牧](#)
 - [自贊](#)
 - [辭世](#)
 - [No. 1378-B 塔銘](#)
 - [No. 1378-C](#)
 - [No. 1378-D 後序](#)
- [卷目次](#)
 - 1
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

大宋無明慧性禪師語錄

目錄

- 序 顏一齊汝勳撰
- 蘄州資福禪寺語錄
- 蘄州北山智度禪寺語錄
- 南康軍廬山歸宗能仁禪寺語錄
- 南康軍廬山開先華藏禪寺語錄
- 南康軍廬山棲賢寶覺禪寺語錄
- 平江府陽山尊相禪寺語錄
- 平江府雙塔壽寧萬歲禪寺語錄
- 頌古
- 法語
- 真讚
- 遺偈
- 塔銘 顏一齊汝勳居士撰
- 徑山無準禪師後序 淨慈北磻禪師後序

No. 1378-A 無明性和尚語錄序

東山一脉。最得人憎。認草本者。多作平常會。奇特會。某處是生機。某處是死句。互分巧拙。俱落窠臼。縱跳得出。又墮解脫深坑。非獨蹉過此老。亦蹉過天下老和尚。添得幾箇冊子。只益雜毒耳。余因序無明語。不覺饒舌。怕有軟頑底。為一齋懺悔也不見得。

淳祐癸卯上巳長洲一齋顏汝勳敬書

No. 1378

蘄州資福禪寺語錄

侍者 妙儼 編

入院。指山門云。萬疊峯巒秀。清虛杳靄間。跨門一句子。擬議隔重關。

佛殿拈香。指天指地。有甚巴鼻。目顧四方。不知失利。累及後代兒孫。以此遞相鈍置。

踞方丈。電激雷奔。以毒攻毒。撒土拋沙。拗直作曲。箇裏翻身控角弓。誰能背手抽金鏃。

法座云。不知立處高多少。回頭四顧白雲低。等閑移步毗盧頂。拽轉南辰安向西。

拈衣云。要入牯牛隊。還披水牯皮。全身行異類。拽杷又牽犁。陞座。拈香祝 聖罷。次拈香云。此一瓣香。昔在佛照禪師處得其體。松源和尚處得其用。雖然體用雙全。浮沈湖海。未曾有一人酬價。而今一客不煩兩主。爇向爐中。奉為前往臨安府靈隱先師和尚。用酬法乳。遂斂衣就座 僧問云。龍象四集。寶座已登。學人上來。請師祝 聖。答云。一氣不言含有象。萬靈何處謝無私。進云。如何是把定要津句。師云。擬議則差白雲萬里。進云。如何是坐斷乾坤句。師云。天高群象正。海闊百川朝。進云。如何是坐斷報化佛頭句。師云。大用現前不存軌則。進云。便恁麼去時如何。師云。更參三參三十年。僧禮拜。師乃云。行盡迢迢路。無山不是家。跨門一句子。擬議隔天涯。四山空闊。一徑幽深。樓閣崢嶸。峯巒疊翠。全是自家本地。發明古佛家風。不免高掛鉢囊。拗折拄杖。安家樂業。鼓腹謳歌。更不他求。是成活計。至於山禽聚集。牛動尾巴。虎嘯龍吟。風清露白。溪山雲月。處處同風。水鳥樹林。頭頭顯露。且道共樂昇平一句。如何話會。倒把少林無孔笛。逆風吹了順風吹。

復舉保壽開堂。三聖推出一僧。保壽便打。師云。將謂侯白。更有侯黑。三聖云。恁麼為人。非但瞎却這僧眼。瞎却鎮州一城人眼去在。師云。賊須賊捉。保壽便歸方丈。師云。虎頭虎尾一時收。諸人要識二大老子落處麼。卓拄杖一下云。風定花猶落。鳥啼山更幽。

上堂云。有語中無語。達磨九年空面壁。無語中有語。空生巖畔花狼藉。有無俱泯又且如何。南斗八北斗七。

上堂云。啞却我口禿我舌。明眼衲僧難辨別。遂擲下拄杖云。今朝撒向諸人前。須彌燈王笑不徹。

上堂云。舉雲門示眾云。天寒日短。兩人共一椀。師云。雲門家風太儉。資福則不然。天寒日短。三平二滿。虎咬大虫。雄鷄生卵。且道。明什麼邊事。參。

謝知事頭首上堂云。迅雷聲裏。閃電光中。棒喝交馳。主賓互顯。正恁麼時。且道是誰家風月。以拂子擊禪牀云。數片白雲生宇宙。普天無處不垂陰。

上堂云。言發非聲。舌頭無骨。色前不物。狐狸戀窟。畢竟如何是不落聲色底句。鷓鴣啼處百花香。

蘄州北山智度禪寺語錄

侍者 圓澄 編

上堂云。新梅雪裏依稀拆。愛日窻前迤邐長。漏泄東君好消息。分明遍界不能藏。且道藏不得是箇什麼。卓拄杖云。但得到家田地穩。更無佛法可商量。

上堂云。鳥牙絕頂。結制安居。包羅萬有。吞却十虛。且道。無位真人。在什麼處。良久云。切忌從它覓。迢迢與我疎。

出城回上堂云。往來無間。動靜同源。瞥然而往。瞥然而還。大方無內無外。管甚新年舊年。歸來偃臥青松下。只這些兒妙不傳。

上堂云。方挹新春。又迎朱夏。山不為高。水不為下。梅雨連綿。虛空貼卦。浸爛石烏龜。黃梅添話杷。烏牙峯頂浪滔天。犀牛扇子增高價。

上堂。舉寒山子詩云。吾心似秋月。碧潭清皎潔。無物堪比倫。教我如何說。師云。寒山子坐在解脫深坑。若是北山門下。打你頭破額裂。

上堂云。秋風清。秋月白。鴈過長空。蟬噪庭柏。踢出鐵崑崙。大機要頓發。好肉剜瘡。覷著即瞎。隔山人唱太平歌。元是胡笳十八拍。

上堂云。爽氣生襟袂。清飈襲四維。白雲抱幽石。冷淡更清奇。玲瓏八面自回合。峭峻一方誰敢窺。

因事上堂。毒蛇頭上能揩痒。正是吾家跳竈兒。竊得這些窮伎倆。白拈手裏覓便宜。因。萬仞崖頭獨足立。頭長三尺知是誰。

上堂。十五日巳前。一冬二冬。叉手當胸。十五日巳後。背手抽金鏃。翻身控角弓。正當十五日時如何。風從虎兮雲從龍。擡眸鷄子過遼東。

南康軍廬山歸宗能仁禪寺語錄

侍者 妙全 編

上堂云。春行萬國春無跡。臘雪消殘始見功。頭頭應現。處處流通。木馬泥牛吼。花柳撼春風。

上堂云。春山青。春水綠。草茸茸。花簇簇。若能喪盡目前機。便見廬山真面目。

上堂云。元宵正月半。是處金蓮現。貪看燈明佛。蹉過新羅箭。以拂子擊禪牀云。閃電光中。聊通一線。

上堂云。柳色含煙。千葩競秀。森羅萬象。互顯家風。無位真人。橫身徧界。正恁麼時如何。以拂子擊禪床云。鯨吞海水盡。露出珊瑚枝。

為首座典座上堂云。法社棟梁。叢林綱紀。全殺全活。建立宗旨。雙放雙收。總在這裏。虎嘯風生。龍吟霧起。擊拂子云。大家扶起破砂盆。無限清風來未已。

上堂云。句中句。絕露布。閃電裏。分緇素。且道。紫霄峰高。鸞溪水急。如何緇素。以拂子擊禪牀云。戴嵩牛臥綠楊陰。韓幹馬嘶芳草渡。

上堂云。向上一路滑。壁立萬仞嶮。石火電光鈍。定乾坤句錯。良久云。水牯牛常甘水草。麒麟只有一隻角。千手大悲難摸索。

謝知事上堂云。主中賓。賓中主。南山大虫元是虎。踢起眉毛著眼看。閃電光中急薦取。擊拂子云。發機須是千鈞弩。

上堂云。知有底人。眼中著屑。盡底掀翻。只得一橛。堪笑巴陵老古錐。解道銀碗裏盛雪。

上堂云。滿口道不得底。天下祖師結舌有分。滿眼覷不見底。撞著燈籠露柱。滿耳聽不聞底。鐘鳴鼓響切忌啗啄。休啗啄。滅却臨濟正法眼。破砂盆子何處著。

上堂云。歸宗見成行貨。別無單傳心要。二時展鉢開單。逐日痾屎送尿。飢餐渴飲一般。露柱燈籠大笑。且道笑箇什麼。毗婆尸佛早留心。直至而今不得妙。

上堂云。風蕭蕭兮疎林葉落。月皎皎兮虎嘯猿啼。或聞或見。或悟或迷。會與不會。脫體全提。鼻孔元是向下垂。

上堂云。一葉落天下秋。一塵起大地收。明明祖師意。明明百草頭。相頭買帽。看樓打樓。拂子擊禪牀云。更嫌何處不風流。

上堂云。秋色連天淨。秋花滿地香。圓通門大啟。切忌錯商量。

開爐上堂云。丹霞燒木佛。院主眉鬚落。兩箇無孔鐵鎚。彼此將錯就錯。焦磚打著連底凍。笑它普化搖鈴鐸。

上堂云。雪覆千山。孤峯不白。突出難辨。覷著則瞎。鐵樹花開。冰河焰發。不萌枝上月三更。切忌龍門遭點額。

上堂云。搖唇鼓舌。展事投機。千佛出世。不通懺悔。歸宗知而故犯。是汝諸人。向什麼處著眼。以拂子擊禪牀云。焦巴焦巴。有葉無丫。長天秋水。孤鷺落霞。

上堂。歸宗無法可商量。獨掇單提不覆藏。有問西來端的意。天寒日短夜偏長。

浴佛上堂云。指天指地獨稱尊。攪動乾坤海嶽昏。自從賺殺人無數。直至而今無腦門。

上堂云。雨過長空。簷頭滴滴。覲面相呈。人信不及。信得及。萬古長空元不濕。

上堂云。一即一切。一切即一。拈青玉峽。向焦螟眼中。撮大地來。如粟米粒。會則事同一家。不會則知我受屈。

上堂云。獨標萬象。物外宣揚。卓拄杖云。天長地久。地久天長。

上堂云。無作無為。無說無示。可以濟群類統萬邦。同六虛融三際。卓拄杖云。此是吾家第一義。

南康軍廬山開先華藏禪寺語錄

侍者 道隆 編

入院。指山門云。瀑布懸崖落半空。等閑平步廣寒宮。乘時坐斷孤峯頂。千聖從教立下風。

佛殿云。祖禰不了。兒孫遭累。祝著磕著。無處回避。不辭禮拜燒香。也要遞相鈍置。

方丈云。作家爐鞴。本分鉗鎚。不用埋兵施陷虎。白拈手裏覓便宜。

法座云。喝散白雲。穿開碧落。一步闊一步。一著高一著。

陞座。祝 聖罷。據坐云。未舉先知孰與論。掀騰海嶽動乾坤。嶮

崖句裏翻身轉。盤走珠兮珠走盤。僧問云。如何是臨濟宗。師云。

迅雷不及掩耳。進云。如何是洵仰宗。師云。父子不相傳。進云。

如何是雲門宗。師云。劒去久矣。徒勞刻舟。進云。如何是曹洞

宗。師云。白雲影裏怪石露。流水光中古木青。進云。如何是法眼

宗。師云。心外無法。滿目青山。進云。宗派已蒙師指示。向上宗

乘事若何。師云。花須連夜發。莫待曉風吹。進云。且道昨日歸宗

長老。今日開先主人。畢竟如何。師云。兩頭俱坐斷。一劒倚天

寒。僧禮拜 復云。滿天和氣。匝地韶光。溢目晴輝。影臨萬有。

山花似錦。澗水如藍。蝶戀芳叢。篆不彫之心印。鸞啼谷口。演不

說之妙門。全提鷲嶺拈花。揭示西來密旨。便恁麼去。是處是慈氏

無門無善財。只此便是大安樂田地。只此便是大解脫之場。雖然如

是。共樂無為一句。畢竟如何話會。以拂子擊禪床云。淨智莊嚴功

德聚。祝融峯頂萬年松。

復舉藥山示眾云。與我喚沙彌來。侍僧云。喚沙彌作麼。山云。我

有一箇折脚鐺兒。教伊提上挈下。師云。儉生不孝。義出豐年。覲

面提持。當陽有準。何故。鯨吞海水盡。露出珊瑚枝。

聖節上堂云。一真含法界。大用等虛空。千祥如霧集。萬善若雲

臻。卓拄杖云。用祝吾 皇無量壽。天高無極地無窮。

上堂云。郊原雨過。春日熙熙。桃紅李白。發最上機。啞却口落盡眉。就中一曲江南好。蘆管迎風撩亂吹。

上堂云。聲前一句。十方顯露。佛祖不知。衲僧罔措。拂子擊禪床下座。

上堂云。萬壑千巖。雲霞鎖霧。洞然明白。覲面分付。還有知時別宜底麼。良久云。鴈影落寒潭。孤舟橫野渡。

上堂云。毗盧師。法身主。縱奪臨機些子許。目前分付與阿誰。踢起眉毛急薦取。

上堂云。去聖時遙。人多懈怠。逆則生嗔。順則生愛。不嗔不愛。東海剪刀。西番布袋。解脫門頭緊著關。休誇鋪席無人買。良久云。腦後見腮。和賊捉敗。

上堂云。一番秋雨一番涼。道路無塵野菊香。翻笑昔年陶令尹。攢眉歸去錯商量。恁麼不恁麼。破鏡不重光。若把拈花微笑。是切忌將奴喚作郎。

上堂云。以拄杖橫按云。鼓沒絃琴。復作吹笛勢云。吹無孔笛。共樂堯年同舜日。達磨九年空面壁。

上堂。拈拄杖云。提起則天回地轉。觸處光輝。放下則息慮忘緣。聖凡罔措。不拈不放。又且如何。卓拄杖一下云。翡翠踏翻荷葉雨。鷺鷥衝破綠楊煙。

上堂云。久雨不晴。纔晴又雨。陰陽交泰。萬物得所。明明百草頭。能為萬象主。以拂子擊牀云。覲面相呈。切忌莽鹵。

上堂云。秋風離離。秋色依依。秋雲淡佇。秋月分輝。篆不彫之心印。狀似鐵牛之機。阿呵呵。力因希。再三撈摑始應知。

上堂云。月掛長空。孤峯獨宿。幽鳥數聲清。白雲斷處續。佛眼難窺。拗直作曲。羚羊掛角絕蹤由。無限清風生八極。

松源和尚忌日。上堂云。是句亦割。非句亦割。瞞瞞預預。生鐵門限。如斯出世為人。瞎却衲僧正眼。子細檢點將來。也是徐六擔板。

南康軍廬山棲賢寶覺禪寺語錄

侍者 圓照 編

上堂云。巢知風穴知雨。此是世人知有。只如世尊拈花。迦葉微笑。且道是什麼人知有。卓拄杖云。林間木馬嘶。海底泥牛吼。佛成道上堂云。瞿曇夜半見明星。確觜挑開眼裏筋。四十九年無畏說。至今錯認定盤星。將頭不猛帶累三軍。曹溪波浪如相似。無限平人被陸沈。

上堂云。草離離煙漠漠。雨如膏雲如鶴。說了也。錯錯錯。五老峯高徹骨寒。野猿啼斷山月落。

上堂云。天得一地得一。王得一兮無等匹。一得一又何必。閃電光中加霹靂。朝來細雨灑危層。八面風清照紅日。

上堂云。大包無外。細入無間。內外絕瑕疵。古今無背面。森羅萬象影中藏。四聖六凡光裏現。分明常在諸人前。未審諸人見不見。

卓拄杖云。鐵壁銀山通一線。

上堂云。雪埋松徑。梅著寒梢。露僂僂赤灑灑獨孤標。寒山逢拾得。撫掌笑呵呵。

上堂云。初三十一。中九下七。更不囊藏。當陽拈出。以拂子擊禪床云。一氣轉洪鈞。八方開壽域。

上元日上堂云。心月孤圓。清光皎潔。吞盡十方空。銀碗裏盛雪。以拂子擊禪床云。本光瑞如此。笑倒燈明佛。

上堂云。木犀花散一山秋。更約清風作勝游。笑噉幽香翻葉底。西來祖意在枝頭。沒回互。興悠悠。遼天鼻孔齊穿却。更嫌何處不風流。

上堂云。殺人刀活人劍。劈破虛空成兩片。千妖百怪盡潛蹤。萬象森羅光影現。艾人與門神。端的見不見。卓拄杖云。拄杖子聊通一線。

解夏上堂云。有結有解俱錯。到底無繩自縛。一夏九十日終。箇箇眉鬚墮落。入水長人。填溝塞壑。相逢只解那斯祁。明眼衲僧休卜度。

上堂云。纔開口又成剩語。不開口又成增語。發機須是千鈞弩。草店家風別。翻雲又覆雨。若是陶淵明。攢眉便歸去。

上堂云。松蘿影裏。積翠堆中。白雲為蓋。流泉作琴。隻影獨標巖上月。不知那箇是知音。耳卓朔。頭蓬鬆。擡眸鷓子過遼東。

上堂云。言語動用沒交涉。非言語動用亦沒交涉。傾腸倒腹。為楔出楔。啞却我口禿却舌。明明萬里一條鐵。

上堂舉寒山頌。秋光清淺時。白鷺和煙島。良哉觀世音。全身入荒草。點檢將來。罪過不少。只憑拄杖。一切靠倒。遂靠拄杖下座。

上堂云。掀翻四大海。踢倒須彌盧。心麤膽大。少實多虛。夜見明星曾落節。兒孫隨後受塗糊。

松源忌。木落高秋玉露垂。慎終追遠又思惟。無端一世滅胡種。累及兒孫說向誰。啞却口。落盡眉。牽犁拽杷。帶水拖泥。順捋虎鬚拈蝎尾。白拈手裏覓便宜。家肥生孝子。誰是五逆兒。棲賢今日以此供養松源先師。且道。還來歆饗也無。以手搖拽云。嗚呼嗚呼。秋露春風消息在。不知誰薦上頭機。

平江府陽山尊相禪寺語錄

侍者 法洪 編

入院。指法座云。喝散白雲。穿開碧落。須彌燈王。無處摸索。上堂云。深藏古寺老垂垂。冷暖相諳只自知。不謂使符相苦逼。依然拽又牽犁。

覺報長老至上堂云。開門待知識。知識不來過。知識既來過。畢竟如何通信。拂子擊禪床云。開口不在舌頭上。佇看平地起風波。晚小參云。控佛祖機。瞎人天眼。用生殺句。截葛藤窠。點著不來。千里万里。所以。向上一路滑。壁立萬仞嶮。石火電光鈍。定乾坤句錯。箇是從上來。垛生招箭。尊相則別有條章。諸佛不曾出世。亦無一法與人。達磨不西來。二祖不得髓。見佛見祖。如生冤家。說色說心。如逢猛虎。若是錦鱗賴尾底。纔聞恁麼舉著。踢起便行。大棒打不回頭。誰敢正眼覷著。若是鈍鳥棲蘆底。一恁三三兩兩。何故曾為浪子偏憐客。為愛貪盃惜醉人。

謝知事頭首。上堂云。佛祖大機。目前密布。主中賓賓中主。雲從龍風從虎。卓拄杖云。發機須是千鈞弩。

歲夜小參。歲盡年窮。無可不可。烹露地牛。燒楮火。野菜只添一筋油。滿鉢和羅唯一飽。笑傲煙霞。白雲風拂。韶陽一曲自高歌。困來一覺和衣倒。淺種深耕得自由。珊瑚枝頭日杲杲。復舉僧問古德。年窮歲盡時如何。德云。東村王老夜燒錢。乃舉頌云。東村王老夜燒錢。打著南邊動北邊。赤骨歷窮誇富貴。日高三丈尚憨眠。

穹窿圓太虛至。上堂云。穹窿山裏老於菟。一點圓明爍太虛。八角磨盤空裏轉。寥落林泉意自殊。超物象。絕名模。將為胡鬚赤。更有赤鬚胡。

上堂云。舉僧問鏡清。深山巖窟中。還有佛法也無。清云。有。僧問。如何是深山巖窟中佛法。云。石頭大底大小底小。或有人出來問尊相。如何是深山巖窟中佛法。只向他道無。因甚如此。只為太近。乃舉頌云。一人道有一人無。正令全提肘後符。昨夜虛空開口笑。石人吞却洞庭湖。

上堂云。離四句。絕百非。一言已出。駟馬難追。一任金烏東出。徒教玉兔沈西。拂子擊禪床云。千鈞之弩。不為鼯鼠而發機。舊住至。上堂云。春雨如膏。春雲如鶴。客從天外來。正是魔王脚。閩外威權。麒麟一角。擊拂子云。轉身一拶驗來端。外道天魔俱膽落。

上堂云。春山青。春水綠。春雨濛濛。春花簇簇。春光滿日畫難成。春風萬里何拘束。肥馬轆轤。瘦馬轆轤。日逐忙忙等閑過。些兒毒氣誰輕觸。

上堂云。今朝四月初一。萬像難逃影質。馬祖陞堂。百丈捲席。祕魔擎叉。魯祖面壁。喚驢作馬。蝦跳不出。麒麟一角尖。烏龜三眼赤。

上堂云。雲收天際。杲日當空。坐立儼然。如何通信。擊拂子云。自是不歸歸便得。五湖煙浪有誰爭。

楞嚴會上堂云。八還正眼頂門開。悟得門門有善財。要識九旬行道處。薰風依舊自南來。

一齊相訪。上堂云。舉問馬大師。不與萬法為侶。是什麼人。師云。問處如毒龍攪海。答處似猛虎靠山。然雖電激星馳。未免總在門外。且道。門裏人如何話會。移花兼蝶至。買石得雲饒。復舉頌云。不與萬法為侶。咬定牙關錯舉。西江吸盡鐵船浮。活提獰龍和角煮。倒騎佛殿出三門。翻手為雲覆手雨。

上堂云。兔馬有角。牛羊無角。智不到處。切忌道著。道著後如何。擊拂子云。拈得鼻孔還失却。

為沂首座上堂云。相見不揚眉。雷轟閃電遲。知音纔側耳。擬議落便宜。威行閩外。瞥轉機輪。拍禪床一下云。大千捏聚一微塵。

拗堂至上堂云。息菴去世肉猶暖。五逆還它五逆兒。海湧峯頭行正令。白拈誰敢覓便宜。

中秋上堂云。舉長沙和尚道。盡大地是一隻眼。盡大地是箇全身。盡十方世界。在自_己光明裏。拍禪床一下云。若人於此見得。清風常滿座。一念百千年。

平江府雙塔壽寧萬歲禪寺語錄

侍者 唯道 編

上堂。衲僧門下。手擎日月。游運神通。背負須彌。全機敵勝。移星換斗。奪食驅耕。又且如何。拂子擊禪牀云。不因汗馬功成力。爭見黃河徹底清。

上堂云。舉雪竇云。十方無壁落。四面亦無門。畢竟向什麼處見客。若道得接手句。許你天上天下。壽寧則不然。金剛圈。栗棘蓬。拈來使用。耀古騰今。格外知音纔領略。四方八面起清風。

上堂云。無語中有語。名曰死句。有語中無語。名曰活句。可謂剜肉作瘡。皮穿骨露。舉不顧即差牙。閃電光中走烏兔。

上堂。十五日巳前。風吹不入。十五日巳後。水灑不著。正當十五日時如何。擊禪床云。月中仙桂和根拔。海底泥牛把角牽。

上堂。十九二十。人信不及。拈拂子云。喚作拂子則背。不喚作拂子則觸。而今背觸分明。一句了然百億。且道是那一句。參。

上堂。天寒人寒。大家在這裏。洗面摸著鼻。喫茶濕却背。向上還有事也無。擊拂子云。韓信臨朝底。

魁首至上堂。廬山華藏太湖濱。碓觜挑開眼裏筋。來趁壽寧爐竈熱。大千獨步見鵬程。

上堂云。智不是道。心不是佛。鞞雪峰毬。舞道吾笏。且道明什麼邊事。搖手云。不說不說。

道舊至。上堂。二月春過半。園林一樣新。傍花看蝶舞。近柳聽鶯吟。遠客來相訪。還曾悟此心。林鄭珍。井底種林檎。今年桃李貴。一顆直千金。

上堂云。觀音菩薩。將錢買糊餅。放下元來是箇饅頭。相席打令。看樓打樓。擊拂子云。不風流處也風流。

上堂云。燕語鶯吟。俱談實相。春風吹動桃李花。淡煙疎雨籠青嶂。說了也。還會麼。擊禪牀云。切忌起模畫樣。

上堂云。歸宗事理絕。日輪正當午。布袋放憨癡。猫兒捉老鼠。若人會得。超佛越祖卓拄杖。下座。

上堂云。大道縱橫。觸目成現。坐微塵裏。轉大法輪。看看。且道畢竟是左轉右轉。夜來有人。從湖州來。接得淮南信。泗州大聖道。吳中石像。不合一口吞却洞庭湖。直得須彌倒卓。海水逆流。且道。明什麼邊事。參。

頌古

趙州見二菴主

南枝向暖北枝寒。一種春風有兩般。寄語高樓莫吹笛。大家留取倚欄干。

外道問佛

外道懷藏寶鏡時。世尊良久為高提。渾如良馬窺鞭影。不覺全身陷鐵圍。

開口不在舌頭上

明修棧道。暗度陳倉。刻舟猶覓劍。夜雨過瀟湘。

大力量人擡腳不起

只許老胡知。不許老胡會。白雲盡處是青山。行人更在青山外。

大力量人脚下紅線不斷

放兩拋三。瞞神諱鬼。換盆換盆。誰不識你。

瀉山晷運推移

瀉山養子沒來由。叉手人前不識羞。更把琵琶半遮面。不令人見轉風流。

南泉斬猫兒

當陽利劍斬狸奴。刃下翻身會也無。脫下草鞋頭戴出。石人吞却洞庭湖。

法語

寄顏一齊居士

去月特承遣介賣香信物之貺。出示教。益十餘年間。介注於此。方得入頭處。得句不凡。早是著得手脚快。當方見如此。今既得入處。如人喫茅柴酒。少間又闕然而散。又不見了。雖然如此。却已得著手脚處。但只於所得之地崖將去。如一座鐵壁銀山。把得定。作得主。從此有大發明。方始慶快平生。又有一說。若悟目前。不悟自己。為之有足無眼。若悟自己。不悟目前。謂之有眼無足。於此兩頭打徹。百千法門。無量妙義。只在一毫上。千變萬化。到此方是大法明一切處。通透古今譎訛公案。更須遇人始得。所以。涅槃心易會。差別智難明。欲得透脫生死。但只依門下末後一段見處崖將去。於無滋味處。正好著力。大疑之下。必有大悟。十二時中。具決定志。必不相賺。古人見七十員善知識。其中只有一二具大眼目。其餘具正知見而已。宗乘中難得大手段底。為人抽丁拔楔。若[拚-ム+去]得一生不會做將去。有心做無心得。終被門下了却。千生百世。得大自由。萬丐痛自加鞭是幸。

雖得入頭處。且喜。神氣定動。外魔難入。但胸次有疑處追究。午夜入神體究。虛而靈寂而妙。大休大歇。無妙極深。無深極妙。拌一生具決定志。了取此一點。靈驗必不辜負。只恐到無折合處。却不向前。亦枉用前頭工夫。切不可退志。無滋味處。正好著力。方為大力量人。一切語句下。却物為上。逐物為下。切忌隨語生解。是為大病。

室中敲磕足仞。嘗以此事之篤若是。佛法門庭。在諸方無有不鑒覺者。更望一念不生。全體作用處。微細磨窮究得來。方知體用雙全。去住自在。莫聽人口快。須是自有定力始得。

參禪為透脫生死大事。不是為參口頭禪。以求衣食。直須放下身心。退步扣己。萬不失一。所謂羶飡易飽。細嚼難飢。未得知。如喪考妣。得知了。亦如喪考妣。胸次不明。不可妄為。做長老。稱善知識。所謂靈龜負圖。自取喪身之兆。切須照顧。一失人身。萬劫不復。拚却一生不會。埋頭眾底。救取自己。一段大光明藏。今生得之。百劫千生。自得受用。心為帝王。主人若迷。客得其便。時時提取金剛王寶劍。纔有向上向下。聊起斬為三段。不妨性燥。其或未然。莫將閑學解。埋沒祖師心。

寄顏一齋閣內寂室方氏

即心即佛沒譎訛。不動舌頭意氣多。打破虛空行活路。夫妻撫掌笑呵呵。

付淨徹首座竹篋

竹篋付了復何為。佛祖當頭劈面揮。尺水便能翻逆浪。儘教人薦截流機。

沈安齊草菴號常牧

尚墮功勳不自由。還同死水臥泥牛。何如闊進竿頭步。撒手懸崖萬仞頭。

自贊

紫霄峰下。以毒攻毒。撒土拋沙。拗直作曲。撼動四大神州。拳踢掀翻地軸。性禪沒興遭逢。切忌望空呵囑。坐斷千峰頂[寧*頁]頭。一任虛聲聽杓卜。

橫按吹毛。全提正令。毀佛謗法。因邪打正。有時裂轉面皮。天下衲僧乞命。

辭世

七十八年內空外空撒手便行萬古清風。

淳祐辛丑八月乙丑太白名山比丘迢冲敬校
無明和尚語錄(終)

No. 1378-B 塔銘

迪功郎溫州永嘉主簿顏 汝勳 撰并書

朝散郎知信州軍州事方 萬里 篆額

此道有正脉。惟無半點氣息。其殆庶幾。知其可庶幾。謂正脉在是則妄也。迎之而不留。捨之而不遺。北雨南雲。斗移星換。忘存失照。妙亦何立。泉奔嶽頂。探源皆死水。雹降青天。追蹤皆客塵。擬顰朵頤。欲嚙斂色。抽關轉軸。乾坤為之黯黑。龍天雖夙誓呵衛。終無處所。此師。以手搖拽嗚咿久之。不能自己。余知為楊歧九世孫也。師名慧性姓李氏。達之巴渠人也。混然其初。不以點黑污胸臆。才祝髮。束包南游。適淳熙戊申歲也。首謁佛照光。光奇之。一叩得其體。師以無宜路益孜孜。一時昂頭驤角。揩範輝錯。頂癩足胝。每甘心焉。知松源岳得於密菴傑。傑得於應菴華。溯而上之。白雲東山。皆楊歧流出也。師造松源座下。奉勤給侍。奔走為裴回咨決地。晨敲夕磕。針度線引。尤不啣[口*留]。於些子誑訛。師毒深矣。出世蘄之資福。越兩年。遷智度。法社正耀。湖海翕然。歸宗開先棲賢。為古精藍。露沐雲敷。此湧彼洽。獅子一滴。何翅散十斛驢乳。師騰高矣。奧林邃谷。將終遯矣。所至道價寶璧。宗旨淵源。大用脫軌則。推出分常之華藏半座。老作願點額於龍門。時余未識師。以水僧骨傳云。雪覆蘆花欲暮天。到撐沒底謝郎船。離鈎三寸如何道。海底泥牛掙角牽。則師之脉有自矣。贊參請禮往來叩答。余不覺悚汗 撲庵居士。以大根器棟此道。來守姑蘇。勉其主陽山尊相。金奏玉響。主林改色 部使者興敬。稅駕於雙塔。俊衲信友。如赤子赴慈父母。賴以受用者眾。在在籌室。非時相見。靡閒冰暑。闡提亦有作。室中多舉。開口不在舌頭上。大力量人為什麼擡脚不起。大力量人為什麼脚根下紅絲線不斷。虎踞猊座。返擲橫拈。撒火飛星。學者株守己靈。錯認鑿覺。窠臼情

識。墮解脫坑。無地容錐。無錐可卓。猶未夢見在。其示眾曰。向上一路滑。壁立萬仞嶮。石火電光鈍。定乾坤句錯。又曰。心路不絕。祖關不透。盡是依草附木精靈。大法洞明。正好痛棒。狐涎螢火。望風剝落。余之恩怨始啞者啞藥矣。師慨此道累卵。每哽涕。眼目護常住。口體等土木。應世如童。甘逆如飴。履寔踐真。冰堅霜厲。行解相應。名之曰祖之謂也。感微疾。譚笑却藥。叩室候安。起居如常。遣某書遺某偈。誨尤渠渠於余。投筆澡浴趺坐而逝。嘉熙改元。七月二十日也。年七十六。茶毗。舍利珠貫雪骨。了聰久侍師席。確志而正信。併奉鬚髮。歸故里建窣堵。庸示般若靈驗。師示何加損。以余出師門。請銘力甚。於辭受頃。不落擬議。乃銘之曰。

楊歧正脉	出廣入細	白雲東山	互換失利
彷彿依稀	終闕半偈	咄破沙盆	松源飲器
毒流至師	剔骨剝髓	嗚咿嗚咿	以手搖拽
七鎮寶坊	非即非離	有赫厥後	人自侈異
吐吞其誰	如水行地		

No. 1378-C

一齋居士。示及 無明和尚語一編。炷香拜觀。三嘆無已。徑山(師範)書。

No. 1378-D 後序

圓悟等閑道出四箇字。道言如枯柴。道盡陳尊宿。近時據曲彙木床。三日五夜。努得箇上堂四句偈。以顛為倒。以逆為順。因邪打正。必曰因正打邪。指鹿為馬。必曰指馬為鹿。反是謂之順朱。噫不知朱順耳。此弊僅四五十年。餘波末流。渺不可遏。開先老子。提倡一編。度火金。虞其或變。度海囊。虞其或滲。反覆指摘。了不可得。異時商確推一言半句。言猶在耳。今非吳下蒙也。兵車會同。請辟三舍。

淨慈北磧 居簡

[CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
